

摘藻堂四庫全書薈要

集部

欽定四庫全書薈要

集部

王子安集卷二



臣王杰詳校

詳校官助教臣常循

欽定四庫全書薈要

王子安集目錄

卷一

賦

春思賦

并序

七夕賦

九成宮東臺山池賦

并序

遊廟山賦

并序



寒梧棲鳳賦

江曲孤鳧賦 并序

馴鳶賦

卷二

賦

採蓮賦 并序

澗底寒松賦 并序

慈竹賦 并序

青苔賦并序

四言古詩

倬彼我系

勃兄勵序

五言古詩

上巳浮江宴韻得陟字

春日宴樂遊園韻得接字

山亭夜宴

詠風

懷仙并序

忽夢遊仙

七言古詩

秋夜長

採蓮曲

臨高臺

滕王閣

江南弄

落花落

寒夜懷友二首

六言古詩

附

雜曲

卷三

五言律詩

銅雀妓二首

聖泉宴

并序

尋道觀

即昌利觀張
天師居也

散關晨度

別薛華

重別薛華

遊梵宇三覺寺

麻平晚行

送盧主簿

餞韋兵曹

白下驛餞唐少府

杜少府之任蜀州

仲春郊外

郊興

郊園即事

觀佛跡寺

山居晚眺贈王道士

八仙逕

寺南又有昌利觀去寺可數里巖逕窈窕杖而後進

春日還郊

對酒春園作

觀內懷仙

秋日別王長史

上巳浮江宴韻得遙字

長柳

羈遊餞別

易陽早發

焦岼早行和陸四

深灣夜宿

主人依山帶江

傷裴錄事喪子

五言排律

泥谿

秋日仙遊觀贈道士

一作駱賓王詩無首四句

出境遊山二首

三月曲水宴得煙字

盧照鄰和得樽字附

五言絕句

晚屆鳳州

羈春

林塘懷友

山扉夜坐

春莊

春遊

春園

林泉獨飲

登城春望

他鄉敘興

夜興

臨江二首

江亭夜月送別二首

別人四首

贈李十四四首

早春野望

山中

冬郊行望

寒夜思友三首

始平晚息

扶風晝屈離京浸遠

普安建陰題壁

九日

七言絕句

秋江送別二首

蜀中九日登玄武山旅眺

盧照鄰九月九日玄武山旅眺附

邵大震九月九日登玄武山旅眺附

河陽橋代竇郎中佳人荅楊中舍

卷四

序

續書序

黃帝八十一難經序

四分律宗記序

入蜀紀行詩序

三月上巳袂襖序

守歲序

山亭興序

山亭思友人序

卷五

序

滕王閣詩序

遊山廟序

梓潼南江泛舟序

上巳浮江宴序

綿州北亭羣公宴序

夏日登龍門樓寓望序

秋日遊蓮池序

越州秋日宴山亭序

秋日宴洛陽序

卷六

序

晚秋遊武擔山寺序

宇文德陽宅秋夜山亭宴序

遊冀州韓家園序

夏日宴張二林亭序

夏日宴宋五官宅觀畫障序

秋日宴李處士宅序

春日孫學士宅宴序

與員四等宴序

夏日諸公見尋訪詩序

仲氏宅宴序

江寧吳少府宅餞宴序

還冀州別洛下知己序

春夜桑泉別王少府序

卷七

序

秋日楚州郝司戶宅餞崔使君序

秋晚入洛於畢公宅別道王宴序

越州永興李明府宅送蕭三還齊州序

秋夜於綿州羣官席別薛昇華序

秋日餞別序

冬日羈游汾陰送韋少府入洛序

餞宇文明序

感興奉送王少府序

別盧主簿序

送李十五序

送白七序

送劼弟赴太學序

卷八

表

上九成宮頌表

上拜南郊頌表

為原州趙長史請為亡父度人表

啓

上從舅侍郎啓

上武侍極啓

又

上李常伯啓

上皇甫常伯啓

又

上吏部裴侍郎啓

上明員外啓

上許左丞啓

上郎都督啓

卷九

書

上劉右相書

上絳州上官司馬書

為人與蜀城父老書

又

與契苾將軍書

上百里昌言疏附

卷十

論

三國論

八卦卜大演論

平臺秘畧論十首

孝行一

貞修二

藝文三

忠武四

善政五

尊師六

褒客七

幼俊八

規諷九

慎終十

卷十一

頌

乾元殿頌
并序

拜南郊頌
并序

卷十二

頌

九成宮頌
并序

贊

平臺秘畧贊

孝行第一

貞修第二

藝文第三

忠武第四

善政第五

尊師第六

褒客第七

幼俊第八

規諷第九

慎終第十

卷十三

碑

彭州九隴縣孔子廟堂碑

彭州九隴縣龍懷寺碑

卷十四

碑

梓州玄武縣福會寺碑

梓州飛鳥縣白鶴寺碑

梓州通泉縣惠普寺碑

卷十五

碑

益州德陽縣善寂寺碑

益州綿竹縣武都山淨慧寺碑

梓州郪縣兜率寺浮圖碑

梓州郪縣靈瑞寺浮圖碑

卷十六

碑

廣州寶莊嚴寺舍利塔碑

行狀

常州刺史平原郡開國公行狀

臣等謹案王子安集十六卷唐王勃撰勃字

子安絳州龍門人通之孫仕虢州叅軍坐事
除名以渡海溺死事蹟具唐書文苑傳勃文
思敏贍本傳稱其有文集三十卷而楊炯集
序則謂分為二十卷具諸篇目洪邁容齋隨
筆亦稱今存者二十卷蓋猶舊本自明已來
其集久佚原目遂不可考世所傳初唐十二
家集所載勃集僅詩賦二卷而已此本乃明
崇禎中閩人張燮搜緝文苑英華諸書編為

一十六卷已非唐宋之舊而視別本之闕略

者則較為完善勅文為四傑之冠以當時為
裴行儉所譏後代遂以為口實然行儉但論
其器識非論其文藝杜甫嘗比以江河萬古
又比以龍文虎脊歷塊過都韓愈作滕王閣
記亦稱得三王所為序賦記等壯其文詞又
稱竊喜載名其上詞列三王之次有榮耀焉
杜詩韓筆皆弁冕有唐而其持論如是則耳

食者亦可以息喙矣乾隆四十一年六月恭

校上

總纂官臣紀昀臣陸錫熊臣孫士毅

總校官臣陸費墀

唐王子安集舊序

大矣哉文之時義也有天文焉察時以觀其變有人文
焉立言以重其範歷年滋久遞為文質應運以發其明
因人以通其粹仲尼既沒游夏光洙泗之風屈平自沈
唐宋弘汨羅之跡文儒於焉異術詞賦所以殊源逮秦
氏燔書斯文天喪漢皇改運此道不還賈馬蔚興已虧
於雅頌曹王傑起更失於風騷儷俛大猷未忝前載洎
乎潘陸奮發孫許相因繼之以顏謝申之以江鮑梁魏

羣材周隋衆制或苟求蟲篆未盡力於丘墳或獨徇波
瀾不尋源於禮樂會時沿革循名抑揚多守律以自全
罕非常而制物其有飛馳倏忽倜儻紛綸鼓動包四海
之名變化成一家之體蹈前賢之未識探先聖之不言
經籍為心得王何於逸契風雲入思叶張左於神交故
能使六合殊材並推心於意匠八方好事咸受氣於文
樞出軌躅而驤首馳光芒而動俗非君之博物孰能致
於此乎君諱勃字子安太原祁人也其先出自有周濬

哲文明之裔隱乎炎漢弘宣高尚之風晉室南遷家聲
布於淮海宋臣北徙門德勝於河汾宏材繼出達人間
峙祖父通隋秀才高第蜀郡司戶書佐蜀王侍讀大業
末退講藝于龍門其卒也門人謚之曰文中子聞風睹
興起予道惟揣摩三古開闡八風始擯落於鄒韓終激
揚於荀孟父福時歷任太常博士雍州司功交趾六合
二縣令為齊州長史抑惟邦彥是曰人宗絕六藝以成
能兼百行而為德司馬談之晚歲思弘授史之功揚子

雲之暮年遂起參玄之歎君之生也含章是託神何繇
降星辰奇偉之精明何繇出家國賢才之運性非外獎
智乃自然孝本乎未名人應乎初識器業之敏先乎就
傳九歲讀顏氏漢書撰指瑕十卷十歲包綜六經成乎
朞月懸然天得自符昔訓時師百年之學旬日兼之昔
人千載之機立談可見居難則易在塞咸通於術無所
滯於詞無所假幼有鈞衡之畧獨負舟航之用年十有
四時譽斯歸太常伯劉公巡行風俗見而異之曰此神

童也因加表薦對策高第拜為朝散郎沛王之初建國也博選奇士徵為侍讀奉教撰平臺鈔畧十篇書就賜帛五十疋先鳴楚館孤峙齊宮乘忌側目應劉失步臨秀不容尋返初服遠遊江漢登降岷峨觀精氣之會昌翫靈奇之肝蠻考文章之跡徵造作之程神機若助日新其業西南洪筆咸出其詞每有一文海內驚瞻所製九隴縣孔子廟堂碑文宏偉絕人稀代為寶正平之作不能奪也咸亨之初乃參時選三府交辟遇疾辭焉友

人陸季友時為虢州司法盛稱弘農藥物廼求補虢州
叅軍坐免歲餘尋復舊職棄官沈跡就養于交趾焉長
卿坐廢於時君山不合於朝豈無媒也其惟命乎富貴
比於浮雲光陰踰於尺璧著撰之志自此居多觀覽舊
章翱翔羣藝隨方滲漉于何不盡在乎詞翰倍所用心
嘗以龍朔初載文場變體爭構纖微競為雕刻糝之金
玉龍鳳亂之朱紫青黃影帶以徇其功假對以稱其美
骨氣都盡剛健不聞思革其弊用光志業薛令公朝右

文宗託末契而推一變盧照鄰人間才傑覽清規而輟
九攻知音與之矣知己從之矣於是鼓舞其心發洩其
用八紘馳騁於思緒萬代出沒於毫端契將往而必融
防未來而先制動搖文律宮商有奔命之勞沃蕩詞源
河海無息肩之地以茲偉鑒取其雄伯壯而不虛剛而
能潤雕而不碎按而彌堅大則用之以時小則施之有
序徒縱橫以取勢非鼓怒以為資長風一振衆萌自偃
遂使繁綜淺術無藩籬之固紛繪小才失金湯之險積

年綺碎一朝清廓翰苑豁如詞林增峻反諸宏博君之力焉矯枉過正文之權也後進之士翕然景慕久倦樊籠咸思自釋近則面受而心服遠則言發而響應教之者逾於激電傳之者速於置郵得其片言而忽焉高視假其一氣則邈矣孤騫竊形骸者既昭發於樞機吸精微者亦潛附於聲律雖雅才之變例誠壯思之雄宗也妙異之徒別為縱誕專求恠說爭發大言乾坤日月張其文山河鬼神走其思長句以增其滯容氣以廣其靈

已逾江南之風漸成河朔之制謬稱相述罕識其源扣
純粹之精機未投足而先逝覽奔放之偏節已滯心而
忘返廼相循於跼步豈見習於通方信譎不同非墨翟
之過重增其放豈莊周之失唱高罕屬既知之矣以文
罪我其可得乎君以為槁藻彫章研幾之餘事知來藏
往探蹟之所宗隨時以發其惟應便稽古以成其殆察
微循紫宮於北門幽求聖律訪玄扈於東洛響像天人
每攬韋編思弘大易周流窮乎八索變動該乎四營為

之發揮以成注解嘗因夜夢有稱孔夫子而謂之曰易
有太極子其勉之寤而循環思過半矣於是窮著蔡以
像告考文彙以情言既乘理而得玄亦研精而徇道虞
仲翔之盡思徒見三文韓康伯之成功僅踰兩繫君之
所注見光前古與夫發天地之秘藏知鬼神之情狀者
合其心矣君又以幽贊神明非杼軸於人事經營訓導
廼優游於聖作於是編次論語各以羣分窮源造極為
之古訓仰貫一以知歸希體二而致遠為言式序大義

昭然文中子之居龍門也睹隋室之將喪知吾道之未
行循歎鳳之遠圖宗獲麟之遺制裁成大典以贊孔門
討論漢魏迄于晉代刪其詔命為百篇以續書甄正樂
府取其雅興為三百篇以續詩又自晉太熙元年至隋
開皇九年平陳之歲褒貶行事述元經以法春秋門人
薛收竊慕因為元經之傳未就而歿君思崇祖德光宣
興義續薛氏之遺傳制詩書之衆序包舉藝文克融前
烈陳羣稟太丘之訓時不逮焉孔伋傳司寇之文彼何

功矣詩書之序並冠於篇元經之傳未終其業命不我
與有涯先謝春秋二十八皇唐上元三年秋八月不改
其樂顏氏斯殂養空而游賈生終逝嗚呼天道何哉所
注周易窮乎晉卦又注黃帝八十一難幸就其功撰合
論十篇見行於代君平生屬文歲時不倦綴其存者纔
數百篇嗟乎促齡材氣未盡歿而不朽君子貴焉兄勔
及勳磊落詞韻鏗鏘風骨皆九變之雄律也弟助及勛
摠括前藻網羅羣思亦一時之健筆焉友愛之至人倫

所及永言存歿何痛如之援翰記文咸所未忍蓋以投
分相期非宏辭說潸然孽涕究而序之分為二十卷具
諸篇目三部盛作恨不序於生前七志良書空得撰於
身後神其不遠道或存焉華陰楊炯撰

欽定四庫全書薈要卷一萬三千五百七十五

集部

王子安集卷一

唐 王勃 撰

賦

春思賦

并序

咸亨二年余春秋二十有二旅寓巴蜀浮遊歲序殷憂
明時坎壈聖代九隴縣令河東柳太易英達君子也僕
從遊焉高談胸懷頗洩憤懣于時春也風光依然古人
云風景不殊舉目有山河之異不其悲乎僕不才耿介

之士也竊稟宇宙獨用之心受天地不平之氣雖弱植
一介窮途千里未嘗下情於公侯屈色於流俗凜然以金
石自匹猶不能忘情於春則知春之所及遠矣春之所
感深矣此僕所以撫窮賤而惜光陰懷功名而悲歲月
也豈徒幽宮狹路陌上桑間而已哉屈平有言目極千
里傷春心因作春思賦庶幾乎以極春之所至以析心
之去就云爾

若夫年臨九域韶光四極解宇宙之嚴氣起亭臯之春

色況風景兮同序復江山之異國感大運之虛盈見長
河之紆直蜀川風候隔秦川今年節物異常年霜前柳
葉銜霜翠雪裏梅花犯雪妍霜前雪裏知春早看柳看
梅覺春好思萬里之佳期憶三秦之遠道澹蕩春色悠
揚懷抱野何樹而無花水何堤而無草於是僕本恨人
平生自淪懷書去洛抱劍辭秦惜良會之適邁厭他鄉
之苦辛忽逢邊候改遙憶帝鄉春帝鄉迢遞關河裏神
臯欲暮風煙起黃山半入上林園玄灞斜分曲江水玉

臺金闕紛相望千門萬戶遙相似昭陽殿裏報春歸未
央臺上看春暉水精却掛鴛鴦幔雲母斜開翡翠幃競
道西園梅色淺爭知北闕柳陰稀斂態調歌扇迴身正
舞衣銀蠶吐絲猶未暖金燕銜泥試學飛妾本幽閨學
歌舞寧知漢代多巡撫前年齋祭謁甘泉今歲笙簫祠
后土桃花萬騎喧長薄蘭葉千旗照平浦見原野之芳
春憶山河之邃古長干路狹遶長安公子春來不厭看
杏葉裝金轡蒲萄縷玉鞍聳蓋臨平樂迴笳出上蘭上

蘭經鄴杜揮鞭日將暮白馬新臨御溝道青牛近出章
臺路章臺接建章垂柳復垂楊草開馳馬埒花滿鬪雞
塲南隣少婦多妖婉北里王孫駐行憶乍怪前春節候
遲預道今年寒食晚傷紫陌之春度惜青樓之望遠紫
陌青樓照月華珠帷黼帳七香車蛾眉畫來應幾樣蟬
鬢梳時半欲斜恨雕鞍之屆晚痛銀箭之更賒行行避
葉步步看花因狂夫之蕩子成賤妾之倡家狂夫去去
無窮已賤妾春眠春未起自有蘭閨數十重安知榆塞

三千里榆塞連延玉關側雲間沉沉不可識葱山隱隱
金河北霧裏蒼蒼幾重色忽有驛騎出幽并傳道春衣
萬里程龍沙春草遍瀚海春雪生疎勒井泉寒尚竭燕
山烽火夜應明聞道河源路遠遠誰教夫壻苦行行君
行塞外多霜露為想春臺起煙霧遊絲空罥合歡枝落
花自遶相思樹春望年年絕幽閨離緒切春色朝朝異
邊廷羽書至都護新封萬里侯將軍稍定三邊地長旆
猶銜掃雲色寶刀尚擁干星氣昨夜祁連驛使還征夫

猶駐鴈門關君度山川成白首應知歲序歇紅顏紅顏
一別成胡越夫壻連延限城闕羌笛橫吹隴路風戎衣
直照關山月春色徒盈望春悲殊未歇復聞天子幸關
東馳道煙塵萬里紅折羽搖初日繁笳思曉風後騎猶
分長樂館前旌已映洛陽宮洛陽宮城紛合沓離房別
殿花周匝河陽別舍抵長河丹輪紺幃相經過戚里繁
珠翠中閨盛綺羅鳳移金谷舞鶯引石城歌向夕天津
洛橋暮爭驅紫燕黃牛度間居伊水園舊宅邛山路武

子新布金錢埒季倫欲碎珊瑚樹復道西墉春霧寡更
值南津春望寫入金市而乘羊出銅街而試馬葉抱露
而爭密花牽風而亂下錦障紫山羅幃照野司空令尹
之博物二陸三張之文雅新年柏葉之樽上已蘭英之
竿春來併是春何啻兩違秦忽逢江外客復憶江南春
羅衣乘北渚錦袖出東隣江邊小婦無形迹特怨狂夫
事行役鳳凰山上花無數鸚鵡洲中草如積春江澹容
與春期無處所春水春魚樂春汀春鴈舉君道玉門關

何如金陵渚為問逐春人年光幾處新何年春不至何
地不宜春亦有當春逢遠客亦有當春別故人風物雖
同候悲歡各異倫歸去春山恣閒放蕙畹蘭皋行可望
何為悠悠坐惆悵比來作客住臨邛春風春日自相逢
石鏡巖前花屢密玉輪江上葉頻濃高平灞岸三千里
少道梁山一萬重自有春花煎別思無勞春鏡照愁容
盛年耿耿辭鄉國長路遥遥不可極形隨朗月驟東西
思逐浮雲幾南北春蝶參差命儔侶春鶯綿蠻思羽翼

余復何為此方春長歎息會當一舉絕風塵翠蓋朱軒
臨上春朝昇玉署調天紀夕憩金閨奉帝綸長卿未達
終希達曲逆長貧豈剝貧年年送春應未盡一旦逢春
自有人

七夕賦

若夫乾靈鵲識之端地輔龍驂之始憑紫都而受歷按
玄丘而命紀鳳毛鍾挂閭之祥麟角燦椒庭之祉馳朱
軒於九域振黃麾於萬里抗芝館而星羅擢蘭宮而霞
起則有皇慈霧洽聖渥天浮庭分玉禁邸瞰金樓剪鳬
洲於細柳披鶴籞於長楸啟魚鈴而分帝術授虹璧而
控神州擁黃山於石磴洩玄灞於銅溝列瑤牕而送燠
闢銀牕而迎秋君王乃排青幌搖朱舄戒鵷輿靜鸞掖

繞露廊而轉步，僊雲阡而縱跡。嘯陳客於金牀，命淮仙於桂席。翔翠罕於雲甸，迎吹簫於鳳驛。佇靈匹於星期，眷神姿於月夕。于時玉繩湛色，金漢斜光。煙淒碧樹，露濕銀塘。視蓮潭之變彩，見松院之生涼。引驚蟬於寶瑟，宿蘭燕於瑤筐。綠臺兮千仞，頽樓兮百常。拂花筵而慘惻，披彩序而徜徉。結遙情於漢陌，飛永睇於霞莊。想佳人兮如在，怨靈歡兮未揚。促遙悲於四運，味遺歌於七襄。於是虬簷晚靜，魚扃夜飾。忘帝子之光華，下君王之

顏色握犀管展魚箋顧執事招仲宣仲宣跪而稱曰臣
聞九變無津三靈有作布元氣於浩蕩運太虛於寥廓
辨河鼓於西埂降天孫於東壻循五緯而清黃道正三
衡而澄紫落海人支石之機江女穿針之閣鄙塵情於
春念擬仙契於秋諾河光清地岳山氣歛天標霜凝碧
宙水瑩丹霄躍麟軒於霧術褰羽旆於星橋徵赤螭而
架渚漾青翰而乘潮停翠梭兮卷霜縠引駕杼兮割冰
綃舉黃花而乘月駕籠黛葉而卷雲翹撫今情而恨促

指來渚而傷遙既而丹軒黃

一作萬

棋紫房朱

一作千

籥仙

御逶遲靈徒擾弱風驚雨驟煙迴電爍蝸皇召巨野之
龍莊叟命雕陵之鵲駐麟駕披鸞幕奏雲和汎霞酌碧
虬玉室之饌白兔銀臺之藥荷葉頰鮫芙蓉青雀上元
錦書傳寶字王母瓊箱薦金約綵襟魚頭比目縫香絨
燕尾同心縛羅帳五花懸珉砌百枝然下芸幃而暱枕
弛蘭服而交筵託新歡而密勿懷往眷而潺湲於是羈
鸞切鏡旅鶴驚絃悲侵玉履念起金鈿儼歸裝而容曳

整還蓋而遷延洞庭波兮秋水急關山晦兮夕霧連謂
河漢之無浪似參商之永年君王乃背彤砌陟玄室沖
想自閒神情如逸痛靈妃之稀偶嘉沉思之可畢荆豔
齊升燕佳並出金聲玉韻蕙心蘭質朱攏綺檻北風臺
繡戶雕牕南向開響曳紅雲歌面近香隨白雪舞腰來
掩清琴而獨進淩絳樹而輕迴盧女黃金之腕張家碧
玉之杯奉君王於終夕夫何怨於良媒俄而月還西漢
霞臨東沼鳬氏鳴秋鷄人唱曉玉闕控鶴瓊林飛鳥君

王乃馭風殿而長懷俯雲臺而自矯矜雅範而霜高穆
沖衿而霞眇迎十客召三英香涵蔗酎吹肅蘭旌娃館
疎兮綠草積歡房寂兮紫苔生聳詞峰於月徑披翰藪
於雲扃方絕元凱而高視豈與梁楚而駢聲

九成宮東臺山池賦并序

九成宮東臺地接閑曠面山臨水爾其松峰桂壑紅泉
碧磴金石千聲雲霞萬色侍郎張公雅思沉鬱永懷梓
匠式侔仙造聿構靈廔織波成止水之源拳石儼干霄
之狀雖沅波覆簣俯藉人機而布葉攢花妙同天會僕
因暇日濫奉清埃敢抽南畝之才聊敘東山之事云爾
若夫金臺妙境玉署仙居酌丹池一作之曉暇候青禁
之宵餘驟沖情於月道飛峻賞於煙墟指山楹而思逸

懷水鏡而神虛既而仰瞻頽嶠俯窺黛壑複嶂煙迴攢
溪霧錯偉沉用之兼濟想神功之可作規疊巘于盤龍
憲飛泉于挂鶴覆簣而縈巖磴浮芥而環川壑採拳石
於瑤濱蹇纖珠於綺薄萍從楚江之帶花轉崑墟之萼
岫蘊玉而虹驚浦涵珠而星落美仁智之同歸信高深
之縱託爾其危岑漏景曲渚留寒高松偃鶴青篠鳴鸞
被蘭丘而結珮照蓮服而披冠激坳堂於別漱引膚寸
於危巒若乃嶺橫雞秀波連鳳液花鳥縈紅蘋魚漾碧

綠衣玄衽頰鱗翠額在林藪而同歡望江湖而齊適及
夫景沉西嶢月下東濱峰深夜久潭靜秋新荷抽水蓋
薜引山茵雪芝獻液露菊傾津嗣南商之逸興有東海
之遐賓保林泉而肆賞混簪紱而同塵何濯纓之有地
如攀桂之無因

欽定四庫全書

卷一

遊廟山賦

并序

玄武山西有廟山東有道君廟蓋幽人之別府也長蘿
巨樹捎翳雲日王子馭風而遊冷然而善益懷霄漢之
舉而忘城闕之戀矣因欲攀洪崖於煙道邀羨門於天
路仙師不存壯志徒爾俄而泉石移景秋陰方積松柏
羣吟悲聲四起背鄉關者無復向時之榮焉嗚呼有其
志無其時則知林泉有窮路之哭一作煙霞多後時之
歎不其悲乎遂作賦曰

陟彼山阿積石峩峩亭臯千里傷如之何啟松崖之密
蔭攀桂岳之崇柯隔浮埃於地絡披顥氣於天羅爾其
綠巖分徑蒼岑對室菌軒丹絢芝塲翠密俯泉石之清
冷臨風颺之瑟颺仰紺臺而攜手望玄都而容膝於是
躡霞岡於玉砌步雲岳於金壇懷妙童與真女想青螭
及碧鸞情恍恍而將逸心迴迴而未安見丹房之晚晦
知紫洞之宵寒既而霧昏千嶂煙浮四野恨流俗之情
多痛飛仙之術寡驅逸思於方外局高情於天下使蓬

瀛可得而宅焉何必懷於此都也亂曰已矣哉吾誰欺
林壑逢地煙霞失時託宇宙兮無日俟鸞虬兮未期他
鄉山谷祇令人悲

寒梧棲鳳賦

以孤清夜月為韻

鳳兮鳳兮來何所圖出應明主言棲高梧梧則嶧陽之
珍木鳳則丹穴之靈雛理符有契誰言則孤遊必有方
駭一作晒南飛之驚鵲音能中呂嗟入夜之啼烏況其靈

光蕭散節物淒清疎葉半殞高歌和鳴鳥也將託其宿
止人也焉知乎此情月照孤影風傳暮聲將振耀其五
色俟簫韶之九成九成則那率舞而下懷彼衆會因知
淳化雖璧沼可飲更能適於醴泉雖瓊林可棲復想巡

於竹榭念是欲往敢忘晝夜苟安安而能遷則思思其
不暇故當披拂寒梧翻然一發自此西序言投北闕若
用之銜詔冀宣命於軒堦若使之遊池庶承恩於歲月
可謂擇木而俟處卜居而後歇豈徒比跡於四靈常栖
栖而沒沒

江曲孤鳬賦并序

梓州之東南涪江之所合有潭焉周數十步青壁絕地
綠波澄天常有孤鳬棲蕩其側飛沉翻啞而天性不違
嗟乎宇宙之容我多矣造化之資我厚矣何必處華池
之內而求稻粱之恩哉遂作賦曰

靈鳳翔兮千仞大鵬飛兮六月雖憑力而易舉終候時
而難發不如深潭之鳥焉順歸潮而出沒迹已存於江
漢心非繫於城闕吮紅藻翻碧蓮刷霧露棲雲煙迫之

則隱馴之則前去就無失沉浮自然爾乃忘機絕慮懷
聲弄影乘駭浪而神驚漾澄瀾而趣靜恥園雞之戀促
悲塞鴻之赴水知動息而多方屢汨洄而自省故其獨
泛單宿全真遠致反復幽溪淹留勝地傷雲鴈之櫻繳
懼泉魚之受餌甘辭稻粱之惠焉而全飲啄之志也

馴鳶賦

海上兮雲中青城兮絳宮金山之斷鶴玉塞之驚鴻謂
江湖之漲不足憩謂宇宙之路不足窮終銜石矢坐觸
金籠聲酸夕露影怨秋風已矣哉何氣高而望闊卒神
瘁而智瘡徒驚迹於仙遊竟纏機於俗網未若茲禽猶
融泛想慚丹丘之麗質謝青田之逸響與道浮沉因時
俯仰去非內懼馴非外獎夫勁翮揮風雄姿觸霧力制
煙道神周天步鬱霄漢之弘圖受園亭之近顧質雖滯

於城闕策已成於雲路陳平負郭之居韓信昌亭之遇
似達人之用晦混塵蒙而自託類君子之含道處蓬蒿
而不忤悲授餌之徒懸痛聞弦之自落故爾放懷於誕
暢此寄心於寥廓

王子安集卷一

欽定四庫全書薈要卷一萬三千五百七十六

集部

王子安集卷二

唐 王勃 撰

賦

採蓮賦

并序

昔之賦芙蓉者多矣雖復曹王潘陸之逸曲孫鮑江蕭
之妙韻莫不權陳麗美粗舉採掇豈所謂究厥麗態窮
其風謠哉頃乘暇景歷覩衆製伏翫累日有不滿焉遂
作賦曰

非登高可以賦者唯採蓮而已矣況洞庭兮紫波復瀟
湘兮綠水或暑雨兮朝霽乍涼風兮暮起黛葉青跼煙
周五湖紅葩絳蘂電鑠千里尤見重於幽客信作謠於
君子爾其珍族廣茂淑類傳鮮藻河渭之空曲被沮漳
之漪漣燭澄灣而爛爛亘修漲之田田豈直水區澤國
江濬海壖是以吳娃越豔鄭婉秦妍感靈翹於上節悅
瑞色於中年錦帆映浦羅衣塞川飛木蘭之畫楫駕芙
蓉之綺船問子何去幽潭採蓮已矣哉誠不知其所以

然賞繇物召興以情遷故其遊泳一致悲欣萬緒至若
金室麗妃璇宮佚女傷鳳臺之寂寞厭鸞局之間處侍
飲南津陪歡北渚見磯岬之紆直覲旌旄之低舉上苑
神池芳林御陂樓陰架沚殿綵乘漪張拜洛之容衛備
橫汾之羽儀簫鼓發兮龍文動鱗羽喧兮鷁首移咸覲
粧而麗服各分驚而並馳蘋紫粲礙荇觸船危視雲霞
之沃蕩望林泉之蔽虧川泱泱兮菡萏積水湛湛兮芙
蕖披惜歲時兮易暮傷君王兮未知折紉房與綳蒨攬

紅葩及碧枝迴綃裙兮竊獨歎步羅襪兮私自奇莫不
驚香悼色畏別傷離復有渚宮年少期門公子翠髮蛾
眉頰脣皓齒傅粉蘭臺之上偷香椒房之裏亦復銜恩
激誓佩寵緘愁承好賜之珍席奉嬉宴之彩旂繡棟曛
兮翠羽帳瑤塘曙兮青翰舟攀條拾藥沿波汴流池心
寬而藻薄浦口窄而萍稠和撓姬之衛吹接橘女之齊
謳去復去兮水色夕採復採兮荷華秋願承歡而卒歲
長接席而寡仇于時薊北無事關西始樂霧靜江垠氛

恬海漠寢怪氣於沅湘照榮光於河洛殊方異類舞詠
相錯王公卿士歌吹並作則有侯家瑣第戚里芳園穿
池灞岍之曲蓄水河陽之源隄防谷口島嶼轅轅嘉木
畢植靈草具繁沉桂北之丹藕擢荆南之紫根鬱萋萋
而霧合粲煜煜而霞翻泊乎氣徹都鄙景萃川陸麥雨
微涼梅飈淺燠命妖侶於石城嘯娛朋於金谷乃使綠
珠捧棹青琴理舳舻擗芳醪藉珍餼汎玉潭之瀰漫遶金
渠之隈隩石近水而苔濃岸連山而樹複排芟末而爭

遠託蘆間而競逐赴汨淩波飛桂振羅風低綠幹水濺
黃螺上客喧兮樂未已美人醉兮顏將酡畏蓮色之如
臉願衣香而勝荷徘徊郢調悽愴燕歌念窮歡於水濱
誓畢賞於川阿結漢女邀湘娥北溪藥尚密南汀花更
多恨光景兮不住指芳馨兮謂何若乃南鄢義妻東吳
信婦結縞整佩承筐奉帚忽君子兮有行復良人兮遠
征南討九真百越北戍雞田鴈城念去魂駭相視骨驚
臨春渚兮一送見秋潭之四平與子之別煙波望絕念

子之寒江山路難水淡淡兮蓮葉紫風颭颭兮荷花丹
剪瑤帶而猶恨折瓊英而不歡既而緣隈逗浦返棹歸
櫓睠芳草兮已殘憶離居兮方苦延素頸於極漲攘皓
腕於神滸惜佳期兮末由徒增思兮何補又若倡姬蕩
媵命侶招羣淇上洛表湘臯汝墳望洲草兮翡翠色動
浦水兮驪龍文願解佩以邀子思褰裳而從君悲時暮
愁日曛鳴環釧兮響窈窕豔珠翠兮光繽紛憐曙野之
絳氣愛晴天之碧雲棹巡汀而柳拂船向渚而菱分掇

翠莖以翳景襲朱萼以為裊挺揖凌亂雲流雨散鳴榔
絡繹霧罷煙釋狀飛虬之蜿蜿若驚鴻之奕奕艇怯奔
潮篙憎淺石絲著手而偏繞刺牽衣而屢襍乃有貴子
王孫乘閒縱觀何平叔之符彩潘安仁之藻翰稅龍馬
於金堤命鳧舟於石岸錦纜翻灑銀牆照爛日側光沉
風驚浪深紆北渚之新贈恣東溪之密尋鴛鴦繡綵之
文履玳瑁瓊華之寶琴扣舷擊榜吳歎越吟溱與洧兮
葉覆水淮與濟兮花冒潯值明月之夕出逢丹霞之夜

臨茱萸歌兮軫妾思兮樂曲兮傷人心伊採蓮之賤事
信忘情之蓋寡雖迹兆於水鄉遂風行於天下感極哀
樂聲參鄭雅是以緬察谷底窮覽地維北盡豐鎬滂潏
南究江沱越沂莫不俟期應節沿濤汎渚薄言採之興
言服之發文局之麗什動幽幌之情詩使人結卷令人
想思宜其色震百草香奪九芝棲碧羽之神雀負青牕
之寶龜紫秩沅記丹經秘詞豈徒加繡柱之光彩曄文
升之華滋已哉向使時無其族代乏厥類獨秀上清之

境不生中國之地學鸞鳳而時來與鸛鷯而間至必能使衆瑞彩沒羣貺色沮湯武齊戒伊臯延佇豈俾夫秦童趙僕倡姬豔女狎而翫之擷而採之乎時有東鄙幽人西園舊客常陪帝子之輿經在天人之籍詠綠竹於風曉賦朱華於月夕暑往寒來忽矣悠哉蓬飄梗逝天涯海際似還邛之寥廓同適越之淫滯蕭索窮途飄颻一隅昔聞七澤今遇五湖聽菱歌兮幾曲視蓮房兮幾株非鄴地之宴語異睢苑之歡娛况復殊方別域重瀛

複嶂虞翻則故鄉寥落許靖則生涯惆悵感芳草之及
時懼修名之或喪誓將剋迹潁上棲影渭陽枕箕岫之
孤石汎磻溪之小塘餐素實兮吸絳芳荷為衣兮芰為
裳永潔已於丘壑長寄心於君王且為歌曰榮華息功
名側奇秀兮異植紅光兮碧色稟天地之淑麗承雨露
之霑飾蓮有藕兮藕有枝才有用兮用有時何當婀娜
花實移為君含香藻鳳池

澗底寒松賦并序

歲八月壬子旅遊於蜀尋茅溪之澗深蹊絕磴人跡罕
到爰有松焉冒霜停雪蒼然百丈雖高柯峻穎不能踰
其岸嗚呼斯松託非其所出羣之器何以別乎蓋物有
殊類而合情士有因感而成興遂作賦曰

惟松之植于澗之幽盤柯跨嶮杳柢憑流寓天地兮何
日凌霜露兮幾秋見時華之屢變知俗態之多浮故其
磊落殊狀森梢峻節紫葉吟風蒼條振雪嗟英覽之稀

遇保真容之未缺攀翠嶠而形疲指丹霄而望絕已矣
哉盖用輕則資衆器宏則施寡信棟梁之已成非榱桷
之相假徒志遠而心屈遂才高而位下斯在物而有焉
余何為而悲者

慈竹賦 井序

廣漢山谷有竹名慈生必向內示不離本修莖巨葉攢
根沓抵叢之大者或至百千株焉而縈結踰乎咫尺好
事君子徙為堦庭之翫焉吁嗟非此土所有乃有厭流
俗之譏動鄉關之思者蓋撫高節而興感覽嘉名而思
歸遂為賦曰

有竹猗猗生于高陂左連瑤帶右雜瓊枝恨幽客之方
賞嗟君侯之不知徙蔚丹谷遷榮綠池氣凜凜而猶在

色蒼蒼而未離屈巖壑之容貌克堦庭之羽儀爾其劃
疆分域駢陰抗趾疊幹龍迴攢根鳳峙防碧露於霄末
翳紅光於暈始崇柯振而雲靄生繁葉動而風飈起擁
涼砌之晨肅屏炎局之晝滓至若白藏載謝玄英肇切
塞北河堅關南地裂觀衆茂之咸悴驗貞輝之獨潔抽
勁綠以垂霜總嚴青而負雪蓋同類之常稟非殊方之
異節若乃宗生族茂天長地久萬牴爭盤千株競糾如
母子之鈎帶似閨門之悌友恐孤秀而成危每羣居而

自守何美名之天屬而和氣之冥受嗟乎道之存矣物
亦有之不背仁而貪地不藏節以遯時故其貞不自眩
用不見疑保夷險之無易哂榮枯之有期俄蓬轉於岷
徼遂萍流於江汜分兄弟於兩鄉隔晨昏於萬里撫貞
容而骨愧伏嘉號而心死庶因感而長懷將策情而勵
已

青苔賦并序

吾之旅遊數月矣憩乎荒澗覩青苔焉緣崖而上乃喟然歎曰嗟乎苔之生於林塘也為幽客之賞苔之生於軒庭也為居人之怨斯擇地而處無累於物也愛憎從而生遂作賦曰

若夫桂洲含潤松崖祕液繞江曲之寒沙抱叢幽之古石汎迴塘而積翠縈修樹而凝碧契山客之奇情諧野人之妙適及其瑤房有寂瓊室無光霏微君子之砌蔓

延君侯之堂引浮青而泛露散輕綠而承霜起金鈿之
舊感驚玉筍之新行若夫弱質綿羃纖滋布濩措形不
用之境託跡無人之路望夷險而齊歸在高深而委遇
惟愛憎之未染何悲歡之詭赴宜其背陽就陰違喧處
靜不根不蒂無華無影恥桃李之暫芳笑蘭桂之不永
故順時而不競每乘幽而自整

四言古詩

倬彼我系

勃兄勵序

倬彼我系舍弟號州叅軍勃所作也傷迫乎家貧
道未成而受祿不得如古之君子四十強而仕也
故本其情性原其事業因陳先人之迹以議出處
致天爵之艱難也

倬彼我系出自有周分疆錫社派別支流居衛仕宋匡
嬴相劉乃武乃文或公或侯晉歷崩圯衣冠擾弊粵自

太原播徂江涇禮喪賢隱時屯道閉王室如燬生人多
殫伊我有器思逢其主自東旋西擇木開宇田彼河曲
家乎汾浦天未厭亂吾將誰輔伊我祖德思濟九埏不
常厥所于茲五遷欲及時也夫豈願焉其位雖屈其言
則傳爰述帝制大蒐王道曰天曰人是祖是考禮樂咸
若詩書具草貽厥孫謀永為家寶伊余小子信慚明哲
彼網有條彼車有轍思屏人事克終前烈于嗟代網卒
余來綯來綯伊何謂余曰仕我瞻先達三十方起夫豈

不懷高山仰止願言毓德啜菽飲水有烏反哺其聲嗷
嗷言念舊德憂心忉忉今我不養歲月其滔僂俛從役
豈敢告勞從役伊何薄求卑位告勞伊何來參卿事名
存實爽負信愆義靜言遐思中心是愧

五言古詩

上巳浮江宴韻得趾字

披觀玉京路駐賞金臺趾逸興懷九仙良辰傾四美松
吟白雲際桂馥青谿裏別有江海一作漢心日暮情何已

春日宴樂遊園韻得接字

帝里寒光盡神臯春望浹梅郊落晚英柳甸驚初葉流
水抽奇弄崩雲灑芳牒清尊湛不空暫喜平生接

山亭夜宴

桂宇幽襟積松臺涼夜永森沉野逕寒肅穆巖扉靜竹
晦南阿色荷翻北潭影清興殊未闌林端照初景

詠風

肅肅涼風

一作景

生加我林壑清驅煙尋磎戶卷霧出山

楹去來固無跡動息如有情日落山水靜為君起松聲

懷仙并序

客有自幽山來者起予以林壑之事而煙霞在焉
思解纓紱永詠山水神與道超跡為形滯故書其

事馬

鶴岑有奇徑麟洲富仙家紫泉漱珠液玄巖列丹葩常
希披塵網眇然登雲車鸞情極霄漢鳳想疲煙霞道存
蓬瀛近意愜朝市賒無為坐惆悵虛此江上華

忽夢遊仙

僕本江上客牽跡在方內寤寐霄漢間居然有靈對翕
爾登霞首依然躡雲背電策驅龍光煙途儼鸞態乘月
披金帔連星解瓊珮浮識俄易歸真遊邈難再寥廓沈

遐想周遑奉遺誨
流俗非我鄉何當釋塵昧

七言古詩

秋夜長

秋夜長殊未央月明露白澄清光層城綺閣遙相望遙相望川無梁北風受節南鴈翔
崇蘭委質時菊芳鳴環曳履出長廊為君秋夜擣衣裳織羅對鳳凰丹綺雙鴛鴦調砧
亂杵思自傷征夫萬里戍他鄉鶴關音信斷龍門道路長君在天一方寒衣徒自香

採蓮曲

採蓮歸綠水芙蓉衣秋風起浪鳬鴈飛桂棹蘭橈下長
浦羅裙玉腕輕搖櫓葉嶼花潭極望平江謳越吹相思
苦相思苦佳期不可駐塞外征夫猶未還江南採蓮今
已暮採蓮花渠今那必盡娼家官道城南把桑葉何如
江上採蓮花蓮花復蓮花花葉何稠疊葉翠本羞眉花
紅強如頰佳人不在茲悵望別離時牽花憐共蒂折藕
愛連絲故情無處所新物徒華滋不惜西津交佩解還
羞北海鴈書遲採蓮歌有節採蓮夜未歇正逢浩蕩江

上風又值徘徊江上月徘徊蓮浦夜相逢吳姬越女何
丰茸共問寒江千里外征客關山路幾重

臨高臺

臨高臺高臺迢遞絕浮埃瑤軒綺構何崔嵬鸞歌鳳
吹清且哀俯瞰長安道萋萋御溝草斜對甘泉路蒼蒼
茂林樹高臺四望同佳氣鬱葱葱紫閣丹樓紛照耀壁
房錦殿相玲瓏東迷長樂觀西指未央宮赤城映朝日
綠樹搖春風旗亭百隊開新市甲第千甍分戚里朱輪

翠蓋不勝春疊榭層楹相對起復有青樓大道中繡戶
文牕雕綺攏錦衾晝不褰羅幃夕未空歌屏朝掩翠粧
鏡晚窺紅為君安寶髻蛾眉罷花叢塵間狹路黯將暮
雲開月色明如素鴛鴦池上兩兩飛鳳凰樓下雙雙度
物色正如此佳期那不顧銀鞍繡轂盛繁華可憐今夜
宿娼家娼家少婦不須顰東園桃李片時春君看舊日
高臺處柏梁銅雀生黃塵

滕王閣

滕王高閣臨江渚，珮玉鳴鸞罷歌舞。
畫棟朝飛南浦雲，珠簾暮捲西山雨。
閒雲潭影日悠悠，物換星移幾度秋。
閣中帝子今何在，檻外長江空自流。

江南弄

江南弄巫山連，楚夢行雲幾相送。
瑤軒金谷上春時，玉童仙女無見期。
紫霧香煙渺難託，清風明月遙相思。
草徒綠，為聽雙飛鳳凰曲。

落花落

落花落落花紛漠漠綠葉青跼暎丹萼與君徘徊上金
閣影拂粧階玳瑁筵香飄舞館茱萸幙落花飛撩亂入
中帷落花春正滿春人歸不歸落花度氛氲遶高樹落
花春已繁春人春不顧綺閣青臺靜且閒羅袂紅巾復
往還盛年不再得高枝難重攀試復旦遊落花裏暮宿
落花間與君落花院臺上起雙鬟

寒夜懷友二首

北山煙霧始茫茫南津霜月正蒼蒼秋深客思紛無已

復值征鴻中夜起

複閣重樓向浦開
秋風明月度江來
故人故情懷故宴
相望相思不相見

六言古詩附

雜曲

智瓊神女來訪文君
蛾眉始約羅裙
初薰歌齊曲韻舞
亂行分若向陽臺
薦枕何啻得勝朝雲

王子安集卷二

謹案目錄第九頁前五行春日孫學士宅宴序刊

本脫士字今增

第十二頁後三行善政刊本善訛益今改

第十四頁前六行彭州九隴縣孔子廟堂碑刊本

目錄作益州夫子廟碑今據楊炯序及碑文改

卷一第一頁後六行庶幾乎刊本脫庶字今增

第二頁前三行雪裏梅花犯雪妍刊本妍訛研據

英華改

第四頁前一行征夫猶駐鴈門關刊本駐作在據

文苑英華改

第六頁後三行金漢斜光刊本斜作餘據文苑英

華改

第八頁前一行關山晦兮夕霧連刊本霧訛露據

文苑英華改

第八頁後三行聳詞鋒于月徑刊本鋒作源據文

苑英華改

第十一頁前三行冷然而善益懷霄漢之舉刊本
善訛善益訛蓋據文苑英華改

第十三頁前一行題下以孤清夜月為韻刊本脫
據文苑英華增

卷二第一頁後二行黛葉青跗刊本葉作質據文
苑英華改

第二頁後五行沿波汴流刊本沿訛沒今改

第四頁後一行襲朱萼以為羣刊本襲訛籠今改

第五頁前五行發文局之麗什刊本麗訛嚴今改
第九頁前二行物亦有之刊本有之作自有按此
句之字入韻據文苑英華改

第十一頁前七行分疆錫社派別支流刊本社作
社支作枝據全唐詩改

第十五頁前三行層城綺閣遙相望遙相望刊本
脫下遙相望三字據全唐詩增

第十六頁前四行臨高臺高臺迢遞絕浮埃刊本

第二句上行一臨字據全唐詩刪



總校官庶吉士臣侍朝

校對官編修臣沈清藻

謄錄監生臣蕭準